

A Is K'anej Dios Bay Cham

ZACARÍAS

Chi yawtej Jehová is conob

1 ¹A yet waxakebxa xajaw yet is cab abilxa yoc Darío yin reyal, a yet tu' max yalon Jehová juntzan k'anej ti' bay Zacarías is chekbej, a ton is c'ajol Berequías, is yitxiquin Ido. Max yalon axca ti':

²⁻³Ayin Jehová in ti', Yajaw in yin Masanil, yelxac'al max tit wowal yin eb echmam, yuj tu' xan al tzet chi wal ti' bay in conob: Ayin wal caw Jehová in chi wala', meltzojanek ayin, cax ok in meltzoj c'apax ayex. ⁴Manchak e pitnej e ba, axca max yun pitnen ba eb e yichmam tu'. Max yal eb in chekbej yet payxa tu' bay eb: Axca wal ti' yalon Jehová Cham Yajaw yin Masanil: Naek wal e ba yin e yob beybalil, c'al yin e yob unbenal, xi Cham, xi eb in chekbej tu', palta maj cha' yab eb, tamwal max yikej eb. ⁵Palta axa tinani' xin, ¿baytal ayoc eb e yichmam tu'? Toltax eb in chekbej, tokwal iquistoc'al ec' eb tinani'. ⁶Axa pax in k'anej, c'al in chekbanil max wal bay eb in chekbej tu', max yun yin eb e yichmam tu', yuj tu' max na ba c'ul eb, cax max yalon eb: Mayal con yut Jehová, Cham Yajaw yin Masanil axca max yun naoni, atac'ala' is mojalil co yob beybalil, c'al co yob unbenal, xi eb, xi Jehová, cachi, xi Cham.

Max yil Zacarías juntzan ayoc yiban chej

⁷Ayin Zacarías in ti', is c'ajol in Berequías, is yitxiquin in Ido, max in cha' juntzan k'anej ti' bay Jehová, yet wal 24 waay yet 11 xajaw (a ton jun xajaw chi yik Sebat), yet-xa is cab abil yoc Darío yin reyal. ⁸A yet ak'balil, max tx'oxlay wil jun ti': Max wil jun axca junok winak ayaj yiban jun cakyin chej, max oc wanaj no' bay jun jobe, xol te arrayán, axa bay yintak jun tu' ay junxa bulan no chej ay mac ayaj yiban. A xol no' tu' ay no cakyin, ay no sakbujinak, ay c'apax no sakyin. ⁹Max in k'anlen axca ti': Mamin, ¿mactxel juntzan ayaj yiban chej tu'? quin chi. Max tak'wi jun ángel chi k'anjab wetok tu' axca ti': Ok in tx'ox ayach, mactxel eb, xi. ¹⁰Yuj tu xin, max yalon cham ayic' bay nan xol juntzan te arrayán tu' axca ti': A ton eb ti' max cheklaytok yuj Jehová yuj toj yilon eb bay masanil yulyibank'inal, xi.

¹¹Max yalon eb ayaj yiban chej tu' bay Cham yángel Jehová ayic' xol te arrayán tu' axca ti': Mayal con ec' bay masanil yulyibank'inal. Watx'c'al max jila', caw wal ayc'al junc'ulal, xi eb. ¹²Max yalon Cham yángel Jehová tu' axca ti': Mamin Jehová, Yajaw ach yin Masanil, atax yet aytek owal yin Jerusalén, c'al yin Judá, ayxa 70 abil tinani'. ¿Jantakto wal ok mayjok, catawal tu' ok cus a c'ul yin eb? xi Cham.

¹³Cax max tak'wi Jehová bay jun ángel chi k'anjab wetok tu', cax max mimanc'ulneni. ¹⁴Yinxac'al aymanil max yal cham ángel tu', tol chi walil juntzan k'anej ti': A ton juntzan ti' max yal Jehová, Cham Yajaw yin Masanil: Ay wal in miman camc'ulal yin Jerusalén, c'al yin tzalan Sión. ¹⁵Yuj tu' xan max k'ak'bi tit wowal yin juntzanxa conob tu' tol c'am jabok chi oc eb il. A yet txennej wowal yin Jerusalén, yelxac'al max ec' eb yiban yak'on yatakilal yin in conob tu'. ¹⁶Yuj wal tu', ayin wal Jehová in chi wal axca ti': A tinani' ok in meltzoy bay Jerusalén, yin in tx'oxon in yabenc'ulal. Ok wak'on ca watx'nelay aj in templo bay tu', cax ok ca watx'nelay c'apax aj Jerusalén tu', xi Jehová, xi cham ángel. ¹⁷Maxtoc'al yal cham ángel tu' ayin axca ti': Al c'apax el juntzanxa ti': A Jehová, Cham Yajaw yin Masanil chi alon axca ti': Ok wi pax aj can juntzan in conob ti', ok in mimanc'ulnej Sión junelxa. Ok walil junelxa tol a Jerusalén ti', in conob tol sic'bil el wuj, xi Jehová, xi cham ángel.

Cab tzet yetal max tx'oxlay yil Zacarías

¹⁸Max in aj t'ananok, cax max wilon caneb yuc'a' no no'. ¹⁹Max in k'anlej bay jun ángel chi k'anjab wetok tu' axca ti': ¿Tzet wal chi yal elapnok caneb yuc'a' no' tu'? quin chi bay. Max yalon ayin: A juntzan yuc'a' no' tu', chi tx'oxtek yipalil juntzan nación max saklemnentok eb aj Judá, eb aj Israel, c'al eb aj Jerusalén, xi.

²⁰Max lajwi tu', max tx'oxon pax Jehová wil canwan eb tenom ch'en. ²¹Max in k'anlen axca ti': ¿Tzet chi ul yun juntzan tenom ch'en ti'? quin chi. Max yalon ayin axca ti': A juntzan tenom ch'en ti', max jayoc eb ul xibteni, c'al yak'on lajwok yipalil juntzan nación max uchon ay conob Judá, cax max saklemnentok eb cajyom bay tu', xi.

A jun winak ibil oc jun tx'an cuerda yuj

2 ¹Max wilon paxok, tol ay jun mac ibil oc jun tx'an cuerda yuj. ²Max in k'anlen bay: ¿Baytal chach toji? quin chi. Max yalon ayin axca ti': Tol chin toj wechej conob Jerusalén, yet chi nachaj elok, jantak is k'atil, c'al jantak is sat, xi.

³Yuj tu xin, max wilon toj jun ángel maxax k'anjab wetok tu'; ay junxa ángel max eltek ul chaoni, a' max alon bay: ⁴Asi' yin aymanil, al bay jun ach'ej tu', tol ok cajay eb anima bay Jerusalén junelxa, cax yelxac'al ok aj can bisil mac ok cajay bay; yelxac'al ok aj c'apax can is jobbejal no' eb, tol manxa

ok je' yoc murallail conob. ⁵Palta a wal caw Jehová chi aloni, tol a' ok oc oyan yinlak Jerusalén, axca junok k'ak'ej yuj coloni, axca junok muralla; axa bay nan xol conob tu', a tu' ok tx'ox is mayk'ak'al, cachi, xi cham ángel.

A Jehová ok colil is conob

⁶⁻⁷A wal Jehová chi alon axca ti': Ayin max ex wak' saklemtok bay masanil yulyibank'inal. Palta a tinani' xin, chi wal ayex axca ti': Elanek yin aymanil bay norte, cax elanek aj bay Babilonia, bay ayex ec' yin mosejal, ex aj Sión, xi Jehová.

⁸⁻⁹A wal caw Jehová Cham Yajaw yin Masanil, max in chekontek wal juntzan k'anej ti' bay juntzan nacionlak max ex uchon saklem ayex ti'. Chi yalon Cham axca ti': Tzanc'al mactxel chi low k'ab yin jun in conob ti', axca wal tol yin neneal in bak' sat chi low k'ab. Yuj wal tu', ayin ok wak' owal yetok juntzan nación tu', cax ayin ok in chek eb ayoc is mosook eb tu'. A eb ok uchon lajwok eb, xi Cham. Axca wal tu' ok yun tx'oxon ba is tzekekial Jehová, axca c'apax tu' ok yun nachaj el e yuj, tol a Cham max in chekontek.

¹⁰A wal caw Jehová chi alon axca ti': Bitnanek yin tzaloje'ulalil ex aj Sión, yujtol ok in jay cajan e xol, xi Cham. ¹¹A yet ok yunen jun ti', xiwil nacionlak ok jayoc bay Jehová, cax ok oc is conobok. Axa caxayxac'al ec' Cham e xol tu'. Caytu' ok yun nachaj el e yuj, tol a ton wal Jehová, Cham Yajaw yin Masanil max in chekontek ayex. ¹²A Jehová ok sataknej Judá junelxa bay sat tx'otx' tx'otx' tol yet Cham yayji ocok, cax ok sic'on c'apax el conob Jerusalén.

¹³Numayokab masanil anima bay yulyibank'inal satak Jehová, yujtol chi jay Cham, petojtac'al bay is cajlobal tol yet yayji bay satcan.

Max q'uexlay pichil Josué

3 ¹Axa max tx'oxlay wila', tol a cham sat sacerdote Josué lecan oc satak Cham yángel Jehová; axa bay yetc'ulal is watx' k'ab Josué tu', a tu' lecan oc Satanás, yet chi yaloctok is mul Josué tu' yuj. ²Axa yalon Cham yángel Jehová tu' bay Satanás axca ti': A Jehová, Cham max sic'on el conob Jerusalén, a' ok ach tzuonok; yujtol a jun winak ti', lajan wal axca junok cux chi ilay eltek bay xol k'ak'ej, xi. ³A pax Josué xin, caw wal tz'iltak is pichil ayocok, lecanc'al oc satak Cham yángel Jehová. ⁴Axa cham ángel tu' max alon bay juntzan is chekbej lecan oc satak, tol chi ilay el is tz'iltak pichil Josué ayoc yuj tu'. Ayman max yal bay Josué axca ti': Chi cam eloni, a chi yal elapnok jun ti', tol ayin chi wican el a mul. A tinani' ok wak' an pichilej yet k'in aocok, xi. ⁵Lajwi tu', max waloni: Matawal chi alay aj junok is k'oxil jolom Josué tu' caw wal sak, quin chi. Max yaon aj eb yin is jolom xin, axa yaon oc eb is pichil yet k'in tu'. Yak'ban tu', waanc'al ec' Cham yángel Jehová bay tu'.

⁶Lajwi tu', max yalon Cham yángel Jehová bay Josué axca ti': ⁷A ton wal juntzan ti' chi yal Jehová Cham Yajaw yin Masanil: Beybalnejc'al in beybal,

cax chekenc'al masanil tzet max wak' onej. Tatol ok on masanil juntzan tu', ok ach occan yilomalok in templo, c'al a taynen yetok yamak'il. Ayin ok wak' ekbej yin oc in satak axca eb in chekbej ayoc in satak ti'. ⁸Chi cam aben xin Josué, ach ti', tol sat sacerdote ayji ocok. Cax chi cam yaben c'apax eb ayoc yin opiso etok, yujtol ayex ti', tx'oxbanil e yayji yuj junok tzet lanan jayocok. Ok witek in chekbej, a ton jun mac chi yik Wolej. ⁹Ayin chi waoc satak Josué jun ch'en ch'en tol ay ukeb is paq'uul. Ayin wal caw ok in tz'ibej oc juntzan k'anej yin. Axca tu xin, yin wal junnej c'ual ok wiel is mul eb cajyom bay jun nación ti'. ¹⁰A wal yet ok apnok jun c'ual tu', a ayex ti', ok e yawtelej e ba. Yinxac'al tzalojc'ulal ok yun e xew yalan yenel xak e yuva, c'al e yigo. Ayin Jehová in Yajaw in yin Masanil chi walon jun ti', xi Jehová, xi cham ángel.

Max tx'oxlay yil Zacarías jun batxclub candil

4 ¹Cax max meltzotjek cham ángel maxax k'anjab wetok tu xin, max xibten el in wayan axcaxac'al yel lenaj is wayan junok tol chi wayi. Max k'anlen ayin axca ti': ²¿Tzet yetal chela'? xi ayin. Max walon bay: Chi wil jun batxclub candil naba oro, yetok jun netal aceite ayajtok yiban. A yin jun batxclub tu' ayoc ukeb candil. Junjunc'al candil tu' ay is tuboal chi ion bey aceite. ³Junej ay cab te olivo yetok jun batxclub candil tu', jun ayoc bay is watx', c'al junxa bay is q'uexan, quin chi bay.

⁴Max in k'anlen c'apax bay axca ti': Mamin, ¿tzet wal chi yal elapnok jun ti'? quin chi bay. ⁵Max yalon Cham ayin: ¿Tom man ojtakok tzet chi yal elapnok? xi ayin. Max waloni: C'amak Mamin, quin chi bay.

⁶Max yalonc'al cham ángel axca ti' ayin: A ton jun k'anej ti' chi yal Jehová Cham Yajaw yin Masanil bay Zorobabel. Manak yuj eb soldado, tamwal yuj ipejal, palta a yuj Wespíritu ok je' oj. ⁷A yatakilal watx'ji templo, caxc'al axca junok miman witz, palta a a satak ach Zorobabel, ok c'aycan ajok. Ach wal caw ok aoc ch'en lajub ch'en tol miman yayji ocok, yak'ban chi el yaw masanil eb conob axca ti': ¡Tx'okxa watx'il yili! ¡Ayokab watx'c'ulal Dios yiban! xixac'al eb, xi Jehová, xi cham ángel.

⁸Max lajwi tu', a Jehová max alon wal jun k'anej axca ti': ⁹A Zorobabel max aon ay yich jun templo ti', ac'ala' a' ok lajon c'apaxok. Catatu', ok nachaj el yuj in conob, tol ayin Jehová Yajaw in yin Masanil max ach in chektok. ¹⁰A juntzan eb tol c'am yelapnok yul sat yet max el yich tu', axa yet ok yilon oc eb tol lanan yaon oc Zorobabel plomo yin ch'en lajub ch'en, ok tzaloj aj eb, xi Cham.

Max lajwi juntzan ti', maxtoc'al yal cham ángel axca ti': A ukeb candil ti', a ton chi tx'oxontek is bak' sat Jehová, tol chi yil bay masanil sat tx'otx', xi.

¹¹Max in k'anlen pax bay: ¿Tzet chi yal elapnok cab te olivo, tol junjunc'al bay junjun is tz'eyil jun batxclub candil tu'? quin chi bay. ¹²Max in k'anlen c'apaxok: ¿Tzet chi yal elapnok cab is k'ab te olivo tol Junej yayji yetok cab tubo naba oro bay chi aytok aceite? quin chi. ¹³Max

tak'wi cham ángel ayin axca ti': ¿Tom man ojtakok tzet chi yal elapnok? ñi ayin. Max walon bay: Man wojtakok Mamin, quin chi.

¹⁴Max yalon ayin: A ton cab ti' chi tx'oxontek eb cawan sic'bil elok, a ton eb chi ak'wi serbil bay Jehová, Cham Yajaw yin Masanil tx'otx' tx'otx', ñi cham ángel.

Tx'an un chi ec' jenenok

5 ¹Ay junxa tzet max tx'oxlay wila'. Ay jun un tz'ibbil, tol chi ec' jenenok max wila'. ²Axa cham ángel tu' max k'anlej ayin axca ti': ¿Tzet yetal chel tu'? ñi ayin. Max walon bay: Ay jun un tz'ibbil chi wila', tol chi ec' jenenok. Baloneb metro is k'atil, yetok nan is so' metro is sat, quin chi.

³Max yalon ayin axca ti': A bay tu' tz'ibbil ay jun yailal tol ok jay yiban masanil eb yobtakwom bay jun nación ti'. Atac'ala' tzet tz'ibbil oc yin is ca paq'uil. Masanil eb elk'om, c'al masanil eb chi yak' is ti' yin lek'tial, ok ilay el eb bay sat tx'otx' tx'otx'. ⁴A wal caw Jehová Cham Yajaw yin Masanil chi alon axca ti': Ayin ok watok jun yailal ti', yet watx' chi octok yul yatut eb elk'om, c'al eb chi locbaj in bi yin lek'tial, cax ok ayjokc'al ec' jun yailal tu' bay tu', masantac'al tol c'amxa junok te patzab, tamwal junokxa ch'en ch'en ok canok, ñi Jehová, ñi cham ángel.

Jun ix ix ayaytok yul jun echbal

⁵Max eltek cham ángel max k'anjab wetok tu', cax max yalon ayin axca ti': Chi cam wal elon jun lanan tx'oxon aj ba tu', ñi ayin. ⁶Max in k'anlej bay axca ti': ¿Tzet yetal jun tu'? quin chi. Max yalon ayin: A jun tu', echbal. A ton chi tx'oxontek is yobtakil eb anima cajan bay yulyibank'inal ti', ñi.

⁷A jun echbal tu', plomo ayoc is makilok. Axa yet max ilay aj is makil tu xin, ix jun chotan aytok yul jun echbal tu'. ⁸Max yalon jun ángel tu' ayin axca ti': A jun ix max el tu', a mulej chi tx'oxtek, ñi. Lajwi tu' max tenlaycan aytok ix yul yuj, axa makchen can ay is makil tol plomo tu'.

⁹Max wilon paxok, ay cawan ix chi tit jenenok. A eb tu' ay xic' eb, axca yet no garza, max yiaj eb jun echbal tu', max toj pax jenenok eb.

¹⁰Max in k'anlen pax bay jun ángel chi k'anjab wetok tu' axca ti': ¿Baytal chi yitok eb jun echbal tu'? quin chi bay. ¹¹Max yalon ayin: Tol ok tok watx'nej eb jun templo bay yul yet Sinar. A yet mayal watx'ji el jun templo tu', axa watx'nen octok chotan eb jun echbal tu' yiban is batx'lubal, ñi.

Caneb carruaje yet owal

6 ¹Ay c'apax junxa tzet max tx'oxlay wila'. Max wil yeltek canebr carruaje yet owal bay nan xol cab tzalan tol naba bronce. ²A jun babel carruaje tu', ibil oc yuj jun cakyin chej. Axa jun yet is cab, k'ekyin no' iney ocok. ³Axa jun yet is yox, sakyin no' iney ocok. Axa jun yet is can, tz'ibibi yili no' iney ocok.

⁴Max in k'anlen bay cham ángel chi k'anjab wetok tu' axca ti': Mamin, ¿tzet wal chi yal elapnok junxa ti'? quin chi bay. ⁵Max yalon jun ángel tu' ayin axca ti': A juntzan ti' chi toj bay caneb makanil bay chi tit cak'ek', yet mayal lajwi yoc eb satak Cham Yajaw bay masanil yulyibank'inal. ⁶A jun carruaje ibil oc yuj no k'ekyin chej tu', chi toj bay nación bay norte. Axa jun carruaje ibil oc yuj no sakyin chej tu', tzakan toj yintak. Axa no tz'ibibi inej oc carruaje tu', chi tojcan bay sur, xi cham ángel tu'.

⁷A juntzan no chej caw wal ay yip tu', chi yochejxac'al chi toj yil bay masanil yulyibank'inal. Max yalon cham ángel tu' bay no' axca ti': Asek e yil bay masanil yulyibank'inal, xi. Cax max toj no' xin.

⁸Max lajwi tu', max awji jun ángel tu' ayin axca ti': Ila wali, a yuj jun carruaje max toj bay nación bay norte, xan ok oc wanaj yowal c'ul Jehová yiban nación tu', xi.

Max oc yikbej cham Josué

⁹A Jehová max alon juntzan k'anej ti' ayin axca ti': ¹⁰Cha' junok ofrenda bay eb meltzojnaktek yin preso bay Babilonia: a ton Heldai, Tobías, c'al Jedaías. Ac'ala' yet jun c'u tu' chach toj pax bay is yatut Josías is c'ajol Sofonías. ¹¹A yetok ch'en plata c'al ch'en oro ok a cha tu', cha watx'nej corona, cax chaon oc yin is jolom Josué sat sacerdote, is c'ajol Josadac. ¹²Cax chalon bay axca ti': A Jehová Cham Yajaw yin Masanil chi aloni, tol a jun mac chi yik Wolej, ok yi' yip bay ayic' tu', cax ok ca watx'nen aj in templo. ¹³A ton t'inanc'alta' ca watx'nen aj in templo tu', cax ok chaon is mimanbilal axca yet junok rey; axa yay chotan yiban is trono yin yajawilal. A bay tz'eyil is trono tu' ok ay chotan jun sacerdote, junxanej yak'on nabal eb cawanil. ¹⁴Axa corona ok a watx'nej tu', axca nabaniltek chi yun cancan bay in templo yet chi nalaytek Helem, Tobías, Jedaías c'al Hen, is c'ajol Sofonías, cachi bay, xi Jehová.

¹⁵Ok tit eb anima bay najat colwaj e yetok, yuj ca watx'nelay aj is templo Jehová. Caytu' ok yun nachaj el e yuj, tol a Jehová Cham Yajaw yin Masanil max in chekontek walon ayex. A jun ti' ok yunej, tatol ayex ti' ok e cha e yabej, c'al e yiken tzet chi yal Jehová co Diosal.

C'ajbanc'ulal man yelok

7 ¹A yet is can c'ual waay yet is baloneb xajaw, (a ton xajaw chi yik Quisleu), yet is can abilxa yoc Darío yin reyal, a yet tu' max k'anjab Jehová ayin Zacarías in ti'. ²A yet tu', a eb aj Betel max chekontek Zarezer, c'al Regem-melec, yetok eb winak ajun yetok eb bay templo Jehová, Cham Yajaw yin Masanil, yet chi k'anlay colwal Cham, ³c'al k'anlen bay eb chekbej Cham, c'al bay eb sacerdote axca ti': ¿Ok mi co pichc'al co ba yetok pichilej yet cusc'ulal, c'al joc yin c'ajbanc'ulal yet is so' xajaw yet junjun abil, yuj max uchchaj ay templo, axcac'alta' chi junej masantac'al tinani'? xi eb.

⁴Axa Jehová max alon ayin axca ti': ⁵Al bay masanil eb anima bay yul nación ti', c'al bay eb sacerdote: Ayex ti', ayxa 70 abilxac'al e beybalnente, tol che yaoc el pichilej e yin, c'al e yoc yin c'ajbanc'ulal yin yet is so' xajaw c'al yet is suk xajaw. Palta man yujok tol ay welapnok yul e sat, xan che yun jun tu'. ⁶Ac'ala' a yet chex lowi, c'al e yuq'uena', asan yuj e yak'on tzalobok e c'ul yul e yet che yunej, xi Jehová, cachi, xi Cham. ⁷A yuchbanil ay templo chi nalaytek tu', a ton yuj yunencan el tzet max wak' yalil eb in chekbej yet payxa, yet ayic' Jerusalén yin junc'ulalil, c'al yet xiwil anima ayic' bay, cax xiwil c'apax conoblak oyan oc yinlak, c'al bay makbej Néguev, yetokc'al bay ac'al, ayc'al anima cajan bay tu'.

Yuj is tenomtakil eb israel max ilaytok eb yin mosejal

⁸Max k'anjab Jehová ayin, max yalon axca ti': ⁹A ton wal juntzan ti' walnak yet payxa bay in conob: Tojolokab ex yin e beyc'ulal, watx' che yut e c'ul, c'al cusoc e c'ul e yin junjun ex. ¹⁰Manchak e yetnej eb ix camnakxa yichamil, tamwal eb unin c'amxa mam c'amxa txutx, tamwal eb tx'ok conobal, c'al eb meba', tamwal e naon yin e yak'on yobc'ulalil e yin junjun ex, quin chi, xi Cham. ¹¹Palta eb conob, maj yikej eb; tx'ok bay t'anantok eb masanil, cax chacanaxac'al max yut ba eb. ¹²Max yak'on cawbok el eb is nabal, axca ch'en sak ch'en, yet watx' c'am chi cha yab eb cuybanilej, c'al chekbanilej max yal Jehová Cham Yajaw yin Masanil yuj Yespíritu yin eb is chekbej yet payxa.

Yuj wal tu' xan yelxac'al miman max yun tit yowal c'ul Jehová. ¹³Max yalon axca ti': Axca wal max yut ba eb tol maj yal c'ul max cha yab ayin, yet max in k'anjab bay eb; cayin c'apax tu' ayin ti', tamwal max in tak'wi bay eb yet max tewi eb ayin. ¹⁴Yuj wal tu' xan max wuch saklem eb, axca chi yut caxxuchum junok tzet yetal. Max tojcan eb bay juntzan nacionlak tol man yojtakok eb. Axa is nación eb, tz'inan tx'otx'xa max yuncan aj yintak eb. C'amxa junokxa mac max cawaycan ec'ok. A is nación eb, caw wal watx'; palta a wal eb max utencantok yin tz'inanil, xi Cham.

Ok cha Jerusalén watx'c'ulal junelxa

8 ¹A Jehová Cham Yajaw yin Masanil max alon jun k'anej ti' ayin axca ti': ²Caywal ti' chi yun walon ayin Jehová in. Caw wal ay yowal in c'ul yuj tzet chi utlay Sión. ³Ok in meltzoj bay Jerusalén, yet chin cajay bay tu' junelxa. Axca tu xin, a Jerusalén tu' ok yik Conob Ikem junelxa. Axa in tzalan ayin Jehová Yajaw in yin Masanil, ok yik tzalan asannej in ay wet. ⁴Eb icham winak, c'al eb ixnamil ix, ok ay chotan eb junelxa bay txonbal bay Jerusalén. Yinxac'al k'okochej ok ec' eb, yujtol caw wal icham animaxa eb. ⁵Axa txonbal, nojnaxxac'al el yuj eb winak unin, c'al eb ix unin chi sakchi bay tu'. ⁶A yet tu', a eb anima aycan bay yul in conobal ti', toxac'al ok c'ayaj c'ul eb yilon jun ti'. A pax ayin xin, man ok

c'ayaj in c'ul wiloni. Ayin ton Jehová in chi wal juntzan ti'. ⁷Ayin ok in col in conob bay yul is k'ab juntzan nación bay yetc'ulal bay chi ajol c'u, c'al bay yayubc'u, ⁸axa wiontek eb cajay bay Jerusalén ti' junelxa. A eb ok oc in conobok, ayinxá ok in oc is Diosalok eb. Ok in yajawbok yin eb yin tojolal, axca max yun waloni, xi Cham. ⁹A ton jun ti' chi yal Jehová Cham Yajaw yin Masanil: Tec'bajek e ba, ayex tol lanan e yaben juntzan k'anej maxax yalil eb in chekbej yettax max ay yich ca watx'nelay in templo, ayin Jehová Yajaw in yin Masanil. ¹⁰A yet yalantok jun c'ual tu', c'am bay chi tit tojol eb nak mulnajwom, c'al tojol no chej chi mulnaji. Yujc'al eb ajc'ul, xan c'am junc'ulal xol eb chi eltok ec'jabok, yujtol ayin max waoc juntzan eb ajc'ulal yin juntzanxa. ¹¹Palta axa tinani' xin, ayin wal caw Jehová Yajaw in yin Masanil chi wala', tol manxa ok wun yin eb chi cancan bay jun conob ti', axca max wun yet yalantok tu'. ¹²Yinxac'al junc'ulalil ok ayjok eb. A is yuva eb, caw wal ok yak' sat. A is tx'otx' eb, yelxac'al ok yak' sat awoj, axa satcan ok ak'on yal ak'bal. Ayinxá ok wak' masanil juntzan tu' bay eb anima chito can bay jun conob ti'. ¹³Axca max yun e binaj ayex Judá ex ti', c'al ayex israel ex ti', yin is catab eb conoblak, axa tinani' xin, ok ex in colilok, cax ok ex binaj yin watx'ilal. C'amc'al jabok chex xiwi, asan tol che tec'baj e ba, xi Cham.

¹⁴Ayin ton Jehová Yajaw in yin Masanil chi wala': Max in na' waon oc yailal eb e yichmam yet max tx'emontek eb wowal. A tzet max in na' tu', max wunej. ¹⁵Cay c'apax tu' tinani' xin, max in na' tol a watx'ilal ok wun bay Jerusalén c'al bay Judá. Yuj wal tu', xan c'am chex xiwi. ¹⁶A ton wal juntzan ti' yowalil ok e yun ayex ti'. Asanc'al tzet yetal yel ok e yal-lej ayex junjun ex. Beyc'ulnejek yin tojolal, yet watx' ay junc'ulal e xol. ¹⁷Manchak e yak'lej yobc'ulalil e yin, tamwal che yak' e ti' yin lek'tial ayex junjun ex. Ayin wal caw Jehová in chi wala', tol caw wal c'am chi wochej masanil juntzan beybalej tu', xi Cham. ¹⁸Max k'anjab Jehová, Cham Yajaw yin Masanil ayin axca ti': ¹⁹A c'ajbanc'ulal chi oc yet is can xajaw, c'al yet is so', yet is suk, c'al yet is lajoneb xajaw, ok yutcan aj ba yin tzalojc'ulal, c'al yin k'in yuj eb yinatil Judá. Yuj tu', camc'ulnejek tojolal c'al junc'ulal, xi Cham. ²⁰A Jehová, Cham Yajaw yin Masanil chi yal axca ti': Oktoc'al tit anima bay juntzanxa mimek conoblak, yet ok jayoc bay Jerusalén. ²¹Axca tu' xin, a junok conobal ok yal bay junokxa: Tonek, ok co k'anek bay Jehová, Cham Yajaw yin Masanil, yet chi yak' is watx'c'ulalil ayon, xi eb. Axa juntzanxa eb ok yal eb axca ti': Ok on tok c'apax ayon ti', xi eb. ²²Catatu' xin, xiwil nacionlak, c'al conoblak xiwil yipalil ok jayoc bay Jerusalén, yet chi ul oc yin ayilal bay Jehová, Cham Yajaw yin Masanil, c'al k'anon eb watx'c'ulal Cham yiban. ²³A yet tu', lajonwan eb tx'ok conobal ok oc nic'an yin is pichil junok Israel, cax ok yalon eb axca ti': Chi jochej chon oc e yetok, yujtol max jabej tol a Dios ayoc e yetok ayex ti', xi eb, xi Jehová.

Yailal ok jayoc yiban eb yajc'ul Israel

9 ¹A ton wal jun k'anej ti' max yal Jehová, tol ok yak' yailal yul yet Hadrac, c'al miman conob Damasco, yujtol ayoc sat Jehová yin masanil nacionlak, axca yayji oc sat yin masanil is tribual Israel. ²Ay c'apax oc sat Cham yin Hamat, a tu' ay tilak makbej Hadrac. Ay c'apax oc sat Cham yin Tiro, c'al yin Sidón tol aj nabal eb. ³A conob Tiro tu' max watx'nej aj muralla, cax max wajban oro c'al plata yinxa bulanil, axcaxa chi yun wajlay oc bulan tx'otx'. ⁴Axa Jehová ok ion ec' masanil bay, ok k'oklaytok is beyomal tu' bay yul a' mar, cax ok tz'acantok jun conob tu' masanil.

⁵A yet ok yilon conob Ascalón jun ti', ok xiwcan ajok. Yelxac'al miman ok yun yaben c'apax ya'il conob Gaza. Axa Ecrón, caw miman yailal ok yab c'apaxok, yujtol ok aycan c'ay is yipc'ulal sat tx'otx'. A Gaza tu', ok cancan yin c'amxa reyal; axa Ascalón, c'amxa junok anima ok cajaycan bay. ⁶Axa bay Asdod, somanxac'al yayji anima ok cajay ec' bay tu'. Chi yalon Jehová axca ti': Axca wal tu' ok yun wion ay is maynejbail eb filisteo. ⁷Manxa ok wak' chi eb no chibej tol aytoc'al oc is chiq'uul, tamwal okto octok yul is ti' eb juntzan loj tol ay yowalil, atac'ala' yalon ley, palta a xol juntzan anima tu', ayto eb ok canok, ok occan eb wetok. Lajanxa ok yuncan eb axca eb aj Judá. Axa eb aj Ecrón tu', lajanxa ok yuncan eb axca eb jebuseo. ⁸Cax ok in ayjokc'al ec' yetok in conob, yuj in taynen eb bay tzanc'al mac ejércitoal chi ec'tok cayti' yaloni. A eb etnewom, majxac'al etnelay in conob yuj eb, ayin wal caw ok wil in conob tu', xi Cham.

Jun is reyal Israel ok jayok

⁹ Axca ti' yalon Jehová: Tzalojanek ex aj conob Sión. Bitnanek yin tzalojc'ulal ex aj Jerusalén. Ilab wal jay e reyal e xol, tojol Cham. A' ok ak'on colbanilej. Yaynakil ok yut ba, ayaj Cham yiban jun no burrito, is yune' jun no txutx burro.

¹⁰ Ok wak' lajwok el is carruaje Efraín, c'al is chej eb bay Jerusalén c'al is julbal eb yet owal. A e rey ok alon el junc'ulal bay masanil nacionlak, cax ok yajawbok bay is ti a' mar, masantac'al bay junxa ti a', chi tojtac'al bay a' Éufrates, masantac'al bay lajubal tx'otx' tx'otx'.

¹¹ A wal ayex aj Jerusalén ex ti', yuj wal in trato e yetok, tol watx' yayji oc yuj chiq'uul junok xajanbal, xan ok ex wiajtek bay jun olan najat yich bay c'am aej, bay preso e yayji.

¹² Mac ex aj preso ex, tol ayinxa oc yipok e c'ul, meltzojanek bay watx' ok ex ayjok. Chi wal ayex, tol ayin ok wak' yaxilal e yiban. Ec'ban ok yun in paktzen ayex, yintak bay max e yab ya'il ti'.

¹³ Ok in k'anbalnej Judá axca julbalej, axa Efraín ok in k'anbalnej yin bak'ok in julbal tu'. A eb aj Sión ok wut eb axca wespada, yin wak'on owal yin eb aj Grecia, xi Cham.

- ¹⁴ A wal caw Jehová ok tx'ox ba yiban is conob. Axca rayos ok yun julwaji. A Jehová, Cham Yajaw ok xu' is trompeta, cax ok ec' lemnaj xol owal cak'ek' chi tit bay sur.
- ¹⁵ A Jehová Cham Yajaw yin Masanil ok colwaj yin is conob tu'. Ok tec'lay ay eb chi julwaj yuj eb is conob tu', cax ok yak' lajwok el eb is yajc'ul. Toxac'al ok el yaw eb conob Cham tu' xol owal axca eb uq'uem an. Ok pulcantok chiq'uul eb ajc'ul yuj eb, axca chi yun pulcantok yin txiquinlak altar chiq'uul no xajanbal ayay yul sec'.
- ¹⁶ A wal yet jun c'ual tu', a Jehová ok colcan el is conob axca chi yun colon junok ilom calnel no calnel. Toxac'al ok tzekeki yili eb yet Cham bay yul is conobal; axcac'al yili ch'en ch'en manxa watx'ilok yili yin junok corona.
- ¹⁷ Caw wal watx' xin, caw wal watx' yili eb aj conob tu'. Yuj xiwil trigo c'al vino, watx'xac'al ok yun ch'ib eb ach'ej c'al eb k'opoj.

Albenal yuj Bekbanilal

10 ¹ K'aneq nabil k'inál bay Jehová axcata' is c'ual. A ton Cham chi pitzc'onen aj rayos, cax caw wal miman chi yut yaontek nab, yet chi ch'ibaj awoj bay e tx'otx' e masanil.

² Man cayok tu' paktzebal chi al-lay bay eb chi k'anlej yab bay yechelej c'al bay eb naom el k'anej yaloni. A juntzan tu' lek'tialc'al, c'am yelapnok. A tzet chi yalil eb wayichwom, toc'al chi ikbelay c'aytok eb chi k'anlej tu' yuj. A is k'anej eb yin mimanc'ulnewi, c'am jabok watx'il; yuj tu' xan toc'al chi c'ayic' jun conob tu' axca no calnel chi yab yail, yujtol c'am yilomal.

³ Yuj tu' xan chi yal Jehová axca ti': Mayal tit wowal yin eb chi taynen in conob, xan ok waoc yailal eb chi ikban eb. Ayin Jehová, Yajaw in yin Masanil ok in taynej in conob, a ton eb yinatil Judá. A eb ok in k'anbalnej axca no chej ak'om owal.

⁴ A bay xol eb tu' ok eltek jun ch'en ch'en tol miman yelapnok, c'al estaca yet mantiado, yetokc'al julbalej yet owal. Chi yal elapnok, tol a bay xol eb tu' ok eltek masanil eb ikbajwom.

⁵ Ok tec'ay eb is yajc'ul, axca tec'on aj eb soldado tz'otz'ew yulak calle. Ok yak'on ayc'ay eb owal, yujtol ayin oc yetok eb, ok elcan q'uixwil eb ayoc yiban chej yuj eb.

⁶ Ayin ok wak' is tec'anil eb yinatil Judá, cax ok wak'on colchaj el eb yinatil José. Axa wikban meltzoy eb bay is conob junelxa tu', yujtol chi ok' in c'ul yin eb. Cax ok can pax can eb junelxa, axca tol c'am bay max wiel eb yin in c'ul. Ayin ton Jehová is Diosal in eb, tol chi wabc'al is txaj eb.

- 7 Tec'an ok yun eb aj Israel axca soldado. Ok tzalobjbok aj c'ul eb axca eb chi uc'wi vino. A yet ok yilon yuninal eb jun ti', ok tzalobjbok aj c'ul eb. Caw wal ok tzalobjbok aj is yanimail eb yuj in colwal.
- 8 Ok in ux'lok bay eb, yuj in wajban oc eb, yujtol colchajnakxa eb wuj. Ok aj wal can is bisil eb, axca wal max yun eb yettax payxa.
- 9 Max in saklemnejtok eb bay xolak nacionlak. Caxc'al mi najat ay eb, palta ok in nalaytek yuj eb. Ay wal jun c'ual ok meltzoy eb yetok yuninal.
- 10 Ok wak' meltzoytek eb bay Egipto, ok wi c'apaxtek eb bay Asiria, axa waontok eb bay Galaad c'al bay Líbano. Xiwilxa ok yun wajnaj oc eb, ijan c'amxa bay ok ayjok eb.
- 11 A yet ok ec'tok eb xol yailal, axca xol a' mar, ayin ok wiel yipal a' mar tu'; axa a' Nilo ok tanaj a'. Ok wak'on lajwok ay is maynejbail eb aj Asiria, c'al wak'on lajwok ay is yikbej eb yajaw bay Egipto.
- 12 Ayin ok wak' yipalil in conob. Wuj wali cax ok je' yuj. Ayin wal Jehová in chi wal juntzan k'anej ti', xi Jehová.

Yayc'aybal eb mimek yajaw chi tx'oxtek te te'

- 11** ¹ Jaklayokab be bay Líbano, yet chi tz'acantok masanil te c'ute' ay bay tu' yuj k'ak'ej.
- ² Ok'okab te taj, yujtol mayal ayc'ay te c'ute', yujtol a juntzan te' manxa watx'ilok tu', mayal lajwi ayok. Ok'okab te matx'jilak bay yul yet Basán, yujtol a te pim k'aktelak, mayal lajwi ayok.
- ³ Axa ayex ilom calnel ex ti', elokab e yaw e yok'i, yujtol mayal ilay ec' e mimanbilal. Chi ablay yel yaw no coj, yujtol mayal lajwi mimek eltzab bay ti a' Jordán.

Eb cawan ilom calnel

⁴ Max yal Jehová in Diosal ayin axca ti': Taynej wal no calnel tol t'inan wal ok camok. ⁵ A eb chi manon el no' tu', chi mak' cam eb no' yin tol c'am jabok tzet chi na eb, axa eb chi txonon no tu', chi yal eb axca ti': Yuj wal dios, a tinani' beyom onxa, xi eb. Tamwal eb acaw yilomal no', c'am jabok chi cus c'ul eb. ⁶ Cayin c'apax tu' ayin ti', c'am jabok ok cus in c'ul yin anima cajan sat tx'otx' ti'; junjunc'al eb ok waoc eb yul k'ab mactxel cajan is cawilal, c'al yul k'ab eb is reyal. A eb tu' ok etnentok sat tx'otx' ti'. Ayin wal caw Jehová in chi wal jun ti'. Majxac'al in col eb anima tu' yul k'ab eb, xi Jehová.

⁷ Catatu' max in oc wilon no calnel tol t'inan mak'lay camok. A eb manom calnel tu', a eb chi ak'on in tojol. Max in sayon cab in k'okoch: A jun max wak' yik Watx'c'ulal, axa junxa xin, max wak' yik Junanebilal. ⁸ Asan yin jun xajaw max in chekon pax oxwan eb ilom calnel; max lajwi aj in mimanc'ulal yin eb, cax yob inxa c'apax yul sat eb.

⁹Max walon bay no calnel tu' axca ti': Manxa ok ex wil tinani'. Ta ay junok ex chex cami, camanek. Ta ay junok mac chex mak'on camok, mak'layokab ex camok, axa ex tol chexto cani, c'aylejexxac'al el e ba, quin chi bay no'.

¹⁰Yuj tu xin, max wiaj te' in k'okoch max wak' yik Watx'c'ulal, max in pak'on k'ajok, yet chi tx'oxil ba tol chi lajwi is trato Jehová max watx'nej yetok masanil nacionlak. ¹¹A ton yet jun c'ual tu', max lajwican jun trato tu', axa eb manom calnel, lanan quin is beyc'ulnen oc eb, cax max nachaj el yuj eb, tol a Jehová lanan k'anjab el yin tzet yetal chi wun tu'. ¹²Max walon bay eb axca ti': Tatol watx' che yila' tojlanejek in; ta c'amak xin, canokab axca tu', quin chi bay eb. Xan 30 bijan ch'en plata max yak' eb in tojolak.

¹³Max yalon Jehová ayin axca ti': I aj juntzan ch'en tumin tu', cax acantok bay c'uanbal tumin bay templo, xi. Max wiontok jun in tojol miman naon eb tu', tol in moj in chaoni, cax max in k'okon aytok bay c'uanbal tumin tu'. ¹⁴Max in pak'on k'aj c'apax junxa te k'okochej max wak' yik Junanebilal. Axca tu' max yun cancan Judá yetok Israel, yin c'amxa uxtakbailejal nan xol eb. ¹⁵Max yalon pax Jehová ayin axca ti': Ut a ba axca jun ilom calnel tol c'am jabok chi yaoc yin c'ul yiloni. ¹⁶Yujtol ok waoc bay jun nación ti' junok yilomal tol yob ok yut ba axca junok ilom calnel c'am chi oc il yuj no' chi c'aytok, tamwal sayon ec'ok, tamwal chi yantej no' yas yayji, tamwal chi yak' lobej no' chi cam yuj wajil. A ti' yet, tol chi chiaytok no bak'ech, tamwal chito can yakan no' yuj. ¹⁷Ok'bal wal c'ul jun yilomal in conob c'am is nabal tu', yujtol max bekcan yilbej. Lowokab ch'en espada yin is k'ab, c'al yin is bak' sat bay is watx'. Sicbokokab can el is k'ab tu', axa is bak' sat tu', tanokabxac'al is k'ak'al yin junelnej, xi Cham.

Is bekbaniilal el Jerusalén

12 ¹A Jehová, Cham max watx'nen satcan, max watx'nen c'apax ay yich tx'otx' tx'otx' ti', Cham chi ak'on c'apax is yiquisal eb anima, caytu' chi yun yalon yin Israel axca ti': ²Ayin Jehová in ti', ok wut tol yuj Jerusalén ok ec' k'ek'on juntzan nacionlak ay is cawilal tu', axca uqu'em an, a yet ok yak'on eb owal yin Jerusalén tu', c'al yin juntzanxa conoblak ay yul yet Judá. ³A yet tu', ok wutcantok Jerusalén axca junok ch'en tol manxa yalilok bay juntzanxa nación. A mactxel ok yochej ok yak'lej yion ajok, ok yasjoktok yuj. Masanilxac'al nacionlak ok waj ba yak'on owal yin Jerusalén. ⁴Yuj tu xin, ayinx ok in xibtej masanil no chej wajan ec' bay tu'; axa eb ayoc yiban no', ok occan eb yin yaxc'ayinakilal. Ok in taynej eb yinatil Judá, cax ok wuteni tol manxa ok je' yilwan is chej juntzan nación tu'. ⁵A wal yet ok yilon eb yajawilal Judá juntzan ti', cax ok yalon eb axca ti': A wal Jehová, Cham Yajaw yin Masanil, is Diosal eb aj Jerusalén jetok, a wal chi ak'on is yipalil eb, xi eb. ⁶A yet tu', ok wut eb yajawilal Judá axca junok tzak'ak' toxac'al caxxayinak chi oc xol te si', axca wal xak k'ak'al junok yuchan taj chi

oc xol ixim trigo yinxá topanil yayji; ok yak'on lajwok el eb masanil juntzan nación ay is cawilal bay yetc'ulal is watx', c'al bay is q'uexan. A yet tu', a eb cajiym bay Jerusalén, watx'c'al ok yun yayji ec' eb junelxa bay is conobal.

⁷Palta ayin Jehová in ti', yin babelal ok in colcan el eb yinatil Judá, yet watx' man ok maynej ba eb yinatil David, c'al yetok masanil eb cajan bay Jerusalén yintak eb aj Judá. ⁸Ayin Jehová in ti', ok in taynej c'apax eb cajan bay Jerusalén tu'. A eb c'am wal yip xol eb tu', caw wal tec'an ok yun eb axca rey David. Axa pax eb yinatil David, lajan is tec'anil eb axca wet, ma axca wángel babel toj satak eb. ⁹A wal yet tu', ayin ok wak' lajwok tzanc'al tzet nacional ok yak' owal yetok Jerusalén tu'.

¹⁰Ok wak' nabalej chabejtak wuj, c'al nabalej yoc yin tewilal ayin, bay eb yinatil David, yetokc'al bay masanil juntzanxa eb cajiym bay Jerusalén. Axa yet ok in il-lay yuj eb max in tekoni, ok ok'aj eb axca yok' junok yuj camichal jun c'otan is c'ajol, ma yuj is babel c'ajol. ¹¹Ok oc wal jun miman cusc'ulal bay Jerusalén, axca wal cusc'ulal chi uj yuj jun dios chi yik Hadad-rimón bay ac'al yet Meguido. ¹²⁻¹⁴Junjunc'al makan inatilej bay nación tu', tx'ok tx'okc'al bay ay eb yet chi ok' eb, axca yinatil David, c'al yinatil Natán, c'al yinatil Leví, c'al yinatil Semei, c'al yetok juntzanxa makan inatilej, tx'ok tx'ok chi ok' eb; c'al yistzil eb, tx'ok bay chi ok' c'apaxok.

13 ¹A wal yet jun c'ual tu', ok jakchaj jun nuk' aej, yet watx' ok je' tx'ajlay el is mul, c'al is yobtakilal eb yinatil David, yetokc'al eb cajiym bay Jerusalén. ²Ayin Jehová in ti' chi wala' tol a bay yul masanil jun nación ti' ok wak' lajwok el masanil tzet chi al-lay oc diosal, yet watx' c'amxa chi nalaytek is bi. Ok wion c'apax el bay yul nación ti' masanil eb chi yaloc ba in chekbejok, c'al masanil eb ayoc nabal yin eb demonio.

³Yuj tu xin, ta ay junok mac chi tz'ak yal in k'anej, axa is mam c'al is txutx ok alon bay axca ti': Ach ti', ok ach camok, ¿tzet yuj xan cha tec'baj a ba alon el a lek'tial k'anej yin tol axcaok tol yet Jehová? Xi eb bay. Ac'al oc is mam c'al is txutx tu', a ok tekon camok, yuj max yut ba in chekbejok. ⁴A yet jun c'ual tu', a eb in chekbej yaloni, ok q'uixwok aj eb yuj tzet max tx'oxlay yila'. Majxa yaoc eb el pichilej axca yet eb in chekbej, yuj yion aytek sat anima; ⁵palta junjunc'al ok yal axca ti': Ayin ti', man chekbejok Dios in; asan tol mulnajwom in. Yettaxc'al unin into, max in k'aytzelay yin mulnajil, xi. ⁶Ta ay junok mactxel chi k'anlen bay axca ti': ¿Tzet yayji juntzan yas en tu xin? ta xi. Axa paktzen axca ti': Max in ak'lay yasjok bay yatut eb wamigo, xi, xi Jehová.

Ok mak'lay cam Cham Yilomal conob Dios

⁷A Jehová Cham Yajaw yin Masanil chi alon axca ti':

Ilayokab aj espada yuj teklay cam Yilomal in calnel, a ton jun junejc'al ay wetok. Ok mak'lay cam jun ilom calnel tu', axa no calnel ok saklemcantok, axa woccan ajc'ulal yin no yunetak calnel tu'.

⁸ Ayin Jehová in chi wala', tol a eb cajan bay jun nación ti', ec'ban nanok eb ok camok. Jaywanxanej eb ok iquisbokcan ec'ok.

⁹ A eb chito cancan tu', ok wak' yab eb yailal, yet chi elcan yobtakil eb, axca wal chi yun sakbanelay el ch'en plata xol k'ak'ej, c'al axca chi yun watx'ji el ch'en oro. Lajwi tu' ok in yawtej eb yetok, cax ok in tak'wok bay eb. Ok waloni tol in conob eb; axa eb ok alon axca ti': A ton wal Jehová co Diosal, xi eb, xi Cham.

Watx' ok elok Jerusalén yet lajubal

14 ¹ Toxa ok jayoc c'ual yet yowal c'ul Jehová, yet ok pojontok eb ajc'ul is tzetok yetal eb cajúom bay Jerusalén, axac'al bay tu' ok pojic'ok.

² A yet jun c'ual tu', ok wajbaj oc Jehová masanil nacionlak yak'on owal yin Jerusalén. Cax ok ayc'ay yuj eb. Ok uchlay eltek eb cajúom bay Jerusalén tu' yulak na, c'al yetnelay eb ix ix yuj eb ajc'ul, cax ok ilaytok nanok eb cajúom tu' preso. Jaywanxanej eb ok cancanok. ³ Palta ayman ok eltek Jehová yak'on owal yetok juntzan nación tu', axcac'al max yun yak'on owal yet payxa. ⁴ A wal yet jun c'ual tu', ok ay batxnaj yakan Cham bay tzalan Olivo bay satak Jerusalén, bay yetc'ulal bay chi ajol c'u. Ok pojchaj ay nan jun tzalan Olivo tu', cax ok jakchaj jun miman jobe, chi tit yetc'ulal bay chi ajol c'u, chi ec'tok bay yetc'ulal yayub c'u. A nanok jun tzalan tu', ok tokcan bay yetc'ulal norte; axa nanxa, ok tokcan bay yetc'ulal sur. ⁵ Axa tu' ok ex elaj bay yul jun jobe nan xol cab tzalan tu', yujtol ok apnoktac'al oc bay Azal, cax ok ex elaj ayex ti', axca max yun yelaj eb e yichmam yuj jun quixcab max ec' yet ayoc Uzías yin reyal bay Judá, axa jayoc Jehová co Diosal yetok masanil eb yet-xa.

⁶ A yet tu', man ok sakbok yuj yakan c'u cax man ok ay numumok.

⁷ C'am junokxa c'ual axca jun c'ual tu', sakk'inalxac'al; c'am acaw c'ualil, tamwal acaw ak'balil, xan a yet ok ay c'u, ayc'al sakk'inal. A jun tu', asan Jehová yojtak tzet ok yunej. ⁸ Axa yet tu xin, ok ajol jun nuk' aej bay Jerusalén, tol ac'ala' yel yakan yet nabil k'inal, c'al yet waresma, a nanok jun aej tu' ok tojcan bay a' Mar Muerto; axa nanxa xin, ok tojcan bay a' mar Mediterráneo. ⁹ A yet jun c'ual tu', asannej Jehová ok yajawbok bay masanil yulyibank'inal ti', asannej Cham Dios. A Dios, asanxanej Jehová is bi ok ak'lay binajok. ¹⁰ Pananxac'al ok yuncantok jun makan tx'otx' ok toktac'al bay Geba masantac'al bay Rimón, bay sur yet Jerusalén. Axa Jerusalén xin, can ok yuncan axca junok tzalan. A bay ok cajay eb anima bay conob Jerusalén, ok toktac'al bay puerta yet Benjamín, masantac'al bay puerta yet yesquinail bay ay jun babel puerta yet payxa. Ok toktac'al bay torreal yet Hananeel, masantac'al bay chi pitz'lay el yal an yuva cham rey. ¹¹ Ok cajay pax anima bay Jerusalén xin; c'amxac'al tzet ok na eb bay tu', yujtol manxa ok uchchajtok.

¹² Palta a pax juntzan nación ok yak' owal yetok Jerusalén xin, caw wal miman ok yun yalay oc is yailal eb yuj Jehová. A eb anima tu', yin wal

yiquisal eb cax ok k'atok is chibejal eb, ok k'atok is bak' sat eb yul is bakil, c'al yak' eb yul is ti'. ¹³A yet jun c'ual tu', caw wal ok aj can xiwc'ulalil xol eb yuj Jehová. Junjunxac'al ok mitx'lej oc ba yetok mac ajun yetok, cax ok mak'len cam ba eb. ¹⁴Axa yet tu xin, ok tit eb aj Judá colwaj yetok eb aj Jerusalén. Cax ok tok'on ec' eb is beyomal masanil nacionlak ay bay is cawilal; xiwil oro, plata, c'al pichilej ok wajbaj eb. ¹⁵Ac'al oc jun yailal max ayc'ay yiban eb anima, ac'ala' ok jay c'apax yiban no chej, no mula, no camello, no burro, c'al yiban masanil is jobbejal no' eb ajc'ul ayic' bay is campamento eb.

¹⁶A yet ok lajwok juntzan tu xin, a eb anima okto cancan bay juntzan conob max yak' owal yin Jerusalén, junjunc'al abil ok jay eb chaon k'in yet Chinama, c'al yoc eb yin ayilal bay Cham Rey, a ton Jehová, Cham Yajaw yin Masanil. ¹⁷Ta ay junok nación bay yulyibank'inal ti', tol c'am chi jay bay Jerusalén ti', yuj yoc yin ayilal bay Cham Rey tu', majxa ayc'ay nab bay is tx'otx'al. ¹⁸Ta a eb aj Egipto c'am chi jayoc chaon k'inal Chinama, ok jayoc yailal yiban eb yuj Jehová, axcac'al yailal ok jay yiban juntzanxa nacionlak, tatol c'am chi jayi. ¹⁹A ton wal jun yailal tu' yowalil ok jayoc yiban Egipto, c'al yiban juntzanxa nación tol c'am chi jay chaon k'inal Chinama.

²⁰A wal yet jun c'ual tu', a yin ch'en campana ibil oc yuj no chej, tz'ibbil oc axca ti': Yet-xac'al Jehová yayji, xi. Yetokc'al xij ok k'anlay bay is templo Jehová bay ok taj no chibej, yet-xac'al Cham, axca wal yayji mimek sec' chi k'anabax bay altar. ²¹Masanil xij bay Jerusalén c'al bay Judá, yet-xac'al Jehová, Cham Yajaw yin Masanil yayji ocok. A mac chi toj yak' junok is xajanbal bay tu', chi je' k'anon juntzan tu', cax chi yak'on taj no chibej chi ak'lay yin xajanbalil. A wal yet jun c'ual tu', c'amxa eb txonjom ok il-lay yin bay is templo Jehová Cham Yajaw yin Masanil.